

**Uunga siunnersuut: Inatsisartut aalajangiiffigisassaattut siunnersuut Kalaallit Nunaannut inatsisissatut siunnersuummut, taarsigassarsisitsisarfiit aamma aningaasaliisarfiit aningaasaateqarnissaat aamma nakkutilliinermi piumasaqaatit pillugit. (CRR), (UPA 2015/107) aamma Akiligassarsisitsisarfinnut aningaasaliisarfinnullu aningaasaateqarnissaq nakkutilliinikkullu piumasaqaateqarnissaq pillugu inatsimmut Kalaallit Nunaannut atuuttussatut siunnersuummut oqaaseqaateqarnissaq pillugu Inatsisartut aalajangiiffigisassaattut siunnersuut (CRD IV-mik atuutsitsilerneq) (UPA 2015/96)**  
(Inuussutissarsiornermut, Suliffeqarnermut, Niuernermet Nunanullu Allanut Tunngasunut Naalakkersuisoq)

### **pillugu**

#### **Inuussutissarsiornermut Ataatsimiititaliap**

#### **ISUMALIUTISSIISSUTAA**

#### **Siunnersuutip aappassaaneerreqarnerani saqqummiunneqartoq**

Ataatsimiititaliaq suliarinninnermini ukuninnga inuttaqarpoq:

Inatsisartunut ilaasortaq Siverth K. Heilmann	(Atassut)	siulittaasoq
Inatsisartunut ilaasortaq Justus Hansen	(Demokraatit)	siulittaasup tullia
Inatsisartunut ilaasortaq Ineqi Kielsen	(Siumut)	
Inatsisartunut ilaasortaq Iddimangiiu Bianco	(Inuit Ataqtigiiit)	
Inatsisartunut ilaasortaq Aqqaluaq B. Egede	(Inuit Ataqtigiiit)	

UPA2015-imi ulloq 15. maj 2015-imi siullermeerinerup kingorna ataatsimiititaliap siunnersuutit misissorpai isumaliutigisanilu Inatsisartunut matumuuna saqqummiullugit.

#### **1. Siunnersuutit imarisaat siunertaallu**

Aningaasaqarnermik suliaasaqarfimmi Danmarkimi aamma Kalaallit Nunaanni inatsisaasut ilarparujussui nunani tamalaani inatsisaasunik, minnerunngitsumillu EU-mi malittarisassianik tunngaveqarput. Kunngip peqqussutissaatut siunnersuutikkut siunertarineqarpoq aningaasanik suliaqarneq pillugu inatsisip atuuttup nutarterneqarnissaa, taamaalillutik EU-mi akiligassarsisitsisarfinnut aningaasaateqarnissamillu piumasaqaammum malitassap (CRD IV-p)

aamma peqqussutip tassunga atasup CRR-ip) malitsigisaanik nunatsinni aningaasaqarnermut inatsisaasut naapertuutsinneqalerlutik. Taamaattumik CRR-imut inatsit peqqussullu manna ataatsikkut Kalaallit Nunaanni atuutsilernissaat tunngavissaatinneqarpoq.

Maanna nutarterinikkut nunatsinni aningaasaqarnermi inatsisit aningaasaqarnermik suliassaqaarfimmi nunani tamalaani inatsisinut kingullermik iluarsiiisutaasunut naapertuutilissapput. Taamaaliornikkut nunatsinni aningaaserivinnut tatiginninneq nukittorsarneqassaaq, taamaalillutillu taakku suliffeqaarfinnut inunnullu unammillersinnaassuseqartumik atugassaqaartitsillutik aningaasaliinissamik neqerooruteqartuarsinnaaqullugit. Nunatsinni aaqjissuussineq nunani tamalaani inissisimaffimmiinngippat nunatsinni instituttinik taarsigassarsiisartut aarleqqutaasinnaasunik nalilersuinerannut sunniuteqassaaq, taamaalillunilu inuussutissarsiuteqartunut, Namminersorlutik Oqartussat suliffeqaarfiutaannut atuisartunullu taarsigassarsianik akitsorsaaqataassalluni.

Aningaasaateqarnissamik piunasaqaammut peqqussummi aalajangersakkat atuutsilernerat nunatsinnut aningaasaqarnikkut immikkoortumut inatsisaasunik, nakkutilliinermik aarleqquteqaarfinnillu aqutsisoqarnermik nukittorsaassaaq, taamaalillunilu aningaasat nalingisa nikerarneranni pitsaanngitsumik ineriartortoqarsinnaaneranut ingerlatsiviit akiuulluarsinnaanerutilerlugit.

Aningaasaateqarnissamik piunasaqaammut peqqussutip aningaaserivinnit sullississutinut aningaasaqarnikkullu sullissinernik niuerfiusuni instituttinut nakkutilliinissamik piunasaqaatit imarai. Aningaasaateqarnissamik piunasaqaammut peqqussutip siunertaa tassaavoq niuerfinni taakkunani suliaqartut aningaasaqarnikkut aalaakkaasuunerisa qulakkeersimanissaat aammalu aningaasaliisartuusut annertuumik illersorneqaarfiunerat. Aammattaaq maleruagassat niuerfiup naammaginartumik atuunnissaanut ilapittuinissamik siunertaqarput.

Kalaallit Nunaat peqqussummut ilaalissappat instituttinut niuerfigisamik pigisaannik aningaasanik imaluunniit naleqartitanik pappialanik toqqortarinnittunut aningaasaqarnikkut piunasaqaatinut tunngatillugu Danmarkimi aamma Savalimmiumi pisartutut Kalaallit Nunaannut malittarisassat assingi atuutilissapput. Tamanna aningaasaliisunut assigiiaarnerusumik illersuinermik aammalu instituttinut suussutsimikkut assingusunut, nunatsinni Danmarkimiluunniit aningaaseriviit pineqaraluarpata naammaginartumik unammillernikkut atugarisassanik qularnaarsissaaq.

Peqqussummi aalajangersakkanik atuutsilernikkut inatsisissatut siunnersuutikkut ilaatigut aningaasaateqarnissamik piunasaqaatinut, annertuumik peqataaffigisanut,

akiliisinnaassutsimut aamma ilisimatitsinissamik piumasaqaatinut malittarisassiat nutaat aalajangersarneqassapput.

Kunngip peqqussutaanut Namminersorlutik Oqartussat oqaaseqaateqarnissaat pillugu Inatsisartut aalajangiinissaannik siunertaq akiligassarsisitsisartunut aningaasaliisarfinnullu aningaasaateqarnissaq nakkutilliinikkullu piumasaqaateqarnissaq pillugu Kalaallit Nunaannut inatsimmut Namminersorlutik Oqartussat oqaaseqaateqarnissaat pillugu Inatsisartut aalajangiiffigisassaattut siunnersuummut qanimut attuumassuteqarpoq. Siunnersuutit taakku marluk ataqatigiissutigaa EU-mi akiligassarsisitsisarfinnut aningaasaateqarnissamillu piumasaqaammut malitassap (CRD IV-p), tassungalu atatillugu peqqussutip (CRR-ip) malitsigisaannik malittarisassianut nunatsinni aningaasaqarnikkut inatsisaasut naapertuutsilernissaannut pisariaqarnertik.

Aningaasaqarnermik suliassaqarfimmi Kalaallit Nunaanni inatsisaasut Danmarkimi nunanilu tamalaani inatsisaasunik, minnerunngitsumillu EU-mi malittarisassanik tunngaveqarput. Naalagaaffeqatigiinni aningaasaqarnermik suliassaqarfimmi assigiiartumik maleruagassaqarnikkut Kalaallit Nunaanni aningaasaliisarnermut malittarisassat sorliit atuunneri pillugit, ilanngullugulu Kalaallit Nunaanni inatsisaasut nunani tamalaani najoqqutarisanik malittarinninnera pillugu nalornisoortoqaanginnissaa qulakkiissavaa. Kalaallit Nunaanni unammillersinnaassusilimmik aningaaseriveqarnerup attassinnaanissaanut tamanna pisariaqarpoq. Aalajangiiffigisassatut siunnersuutit taakku marluk akuersissutiginerisa aningaasaqarnermik suliassaqarfimmi nunani tamalaani maleruagassiinermut kingullermut nunatsinni aningaasaqarnikkut inatsisaasut naapertuutsilissavai.

Malittarisassat najoqqutassallu pillugit nalornisoortoqarneratigut nunatsinni aningaaseriviit nunani tamalaani aningaasanik niuerfinni aningaasanik pissarsiniarnerat akisunerulersinnaavoq, taamaalillunilu namminersortunut inuussutissarsiutinillu ingerlatsisunut, tassunga ilanngullugu suliffeqarfinnut Namminersorlutik Oqartussanit pigineqartunut taarsigassarsiniarneq akisunerulissalluni. Nunatsinni aningaaserivinnut sinaakktissatut piumasaqaataasut pillugit nalornisoortoqaqqunagu Naalagaaffeqatigiinni, tassunga ilanngullugu Savalimmiuni atuuttuusut assigilersillugit aningaasaqarnermik suliassaqarfiusumi piaartumik naleqqussaanissaq pingaaruteqarpoq.

## **2. Siunnersuutit Inatsisartuni siullermeerneqarnerat**

Siunnersuutit siullermeerneqarmata siunnersuutit taakku marluk akuerineqarnissaat ataatsimut isigalugu taparserneqarpoq. Siunnersuutit Inuussutissarsiornermut Ataatsimiititaliami suliarineqartussatut innersuunneqarnissaat Inuit Ataqtigiit oqaaseqartartuata kissaatigaa.

### 3. Tusarniaanermut akissutit

Naalakkersuisut tusarniaanermut allakkiaat malillugu siunnersuutit taakku marluk ulloq 1. maj 2015-imi akissuteqarnissamut piffissalerlugu ulloq 15. april 2015-imi tusarniaassutigalugit nassiunneqarsimapput aammalu Naalakkersuisut tusarniaanermut allakkiaminni paasissutissiipput:

*”Siunnersuutit marluk (CRR-imut peqqussutip aamma akiligassarsisitsisarfinnut aningaasaateqarnissamillu piumasaqaammum malitassap (CRD IV-p) piviusunngortinnissaat pillugit inatsisissatut siunnersuutit) inuussutissarsiutigisalittut suliaqartunut tunngatitatut teknikkikkut inatsisaasussatut pingaarnertullugit suussusersineqassapput.*

*Tamanna tunngavigalugu inuussutissarsiutigisalittut suliaqarsinnaasunut tusarniaaffigisat killilersugaanissaat isumannaatsuusutut isummerfiusimavoq. Tassaappullu Grønlandsbanken, BankNordic, Namminersorlutik Oqartussanut avataanit kukkuniuisartut, Nunatsinni Advokatit aamma Sulisitsisut. Tamanna sioqqullugu Grønlandsbankenimik immikkut ittumik itisiliinerusumik tusarniaasoqarsimavoq.*

*Makkunanga tusarniaanermut akissutisisoqarpoq:*

*Sulisitsisut  
Grønlandsbanken*

*Tusarniaanermut akissutit tigusat siunnersuutinut iluarinnissimaarput, taamaattumillu allannguuteqarnissamut tunngavissiisimanatik.*

#### 3.1 Ataatsimiititaliap tusarniaanermut oqaaseqaatai.

Naak Grønlandsbanken siumoortumik itisiliissutaasumik tusarniaaffigineqarsimagaluartoq tusarniaanermut akissuteqarnissamut piffissarititaq akuerineqarsinnaanngitsumik sivikippallaartoq ataatsimiititaliaq isumaqarpoq, taamaalillunimi tusarniaaffigisat suliamut piginnaanillit tusarniaanermut akissummik peqqissaarullugu suliamik saqqummiussinissaannut periarfissinneqanngimmata. Grønlandsbankenip tusarniaarnermut akissummini oqaatigaa Kalaallit Nunaata SIFI-mik maleruagassamut ilaalernissaanut periarfissaq ima pingaaruteqartigisoq aalajangiiffigisassatut siunnersuummi matumani peqqussutit akuerineqarnissaanni inatsisit allat akuerineqarnissaat utaqeqqaarneqarsinnaanani.

#### 4. Ataatsimiititaliap siunnersuutini suliarinninnera

Siullermeerinermit siunnersuutit partiinit ataatsimut isigalugu taparserneqartut ataatsimiititaliamit maluginiarneqarpoq. Taamaattumillu oqaaseqaatit partiillu oqaaseqartartuisa oqaaseqaataat ataatsimiititaliamit aallarniutigalugu innersuussutigineqassapput.

Siunnersuutit misissornerini ataatsimiititaliap ilaatigut maluginiarpa:

- Kalaallit Nunaanni aningaaserivinnik, ajornartorsiulissagunik inoqutigiinni, suliffeqarfinni nalinginnaasumillu inuiaqatigiinni aningaasaqarnermut annertuunik killup tungaanut kinguneqarsinnaallutik angissusilinnik (SIFI-nik) toqqartuisoqassasoq. Siunertaq tassaalluni aningaaseriviup taamaattup (SIFI) ajornartorsiulernissaanut aarleqqutip annikillisarmissaa, taamaattoqalissagaluarpallu inuiaqatigiinnut naalagaaffimmullu aningaasartuutissat annikillisarneqarnissaat.
- Aningaasaatigisani akimmequtissanut piumasaqaat tunngaviumik aningaasaatigisavinnut naapertuutsinneqassasoq.
- Ilaatigut taarsigassarsiatigut aarleqqutaasunut nalinginnaasunut teknikikut najoqqutassanik atuutsitsilernissamat EU-Kommissioni inatsisitigut tunngavissinneqassasoq.
- Suliffeqarfiup isumannaatsumik ingerlanneqarnissaata qulakkeernissaanut siulersuisut tamarmiullutik ataatsimoorussatut ilisimasassanik, piginnaassutsinik misilittakkanillu naammattunik peqarnissaat piumasaqaataassasoq.
- Aningaasalerinermik suliffeqarfinnut whistleblowerinik (oqaatiginnittartunik) aaqquussinermik pilersitsinissaq pillugu piumasaqaateqartoqassasoq.
- Kalaallit Nunaanni aningaasalerinermik suliffeqarfiit aningaasaatigut tunngavissaqarnissamik piumasaqaateqarfigineqalissasut.

Aningaasaqarnermik suliaasaqarfimmi inatsisinut allannguutissat pisariaqartut allat arlallit atuutsinneqalernissaat pillugu oqaaseqaateqarnissaq pillugu aalajangiiffigisassatut siunnersuummik Naalakkersuisut UKA2015-imi saqqummiussiniartut ataatsimiititaliamit aamma maluginiarneqarpoq.

Akuersineq nunatsinni aningaaseriviit nunani tamalaani aningaasanik niuerfinni taarsigassarsianik pitsaannerusunik akikinnerusunillu pissarsisinnaanissaasa qulakkeernissaanut peqataaqataassaaq, taamaalilluni atuisut, inuussutissarsiutinik ingerlatsisut Namminersorlutillu Oqartussat suliffeqarfiutaat ernianut aningaasartuutaasa sapinngisamik annikinnerpaamiitinnerisigut nunatsinni aningaaserinermik ingerlatsiviit unammillersinnaassusiat attatiinnarneqarsinnaaqullugu.

Taamaattumik ataatsimiititaliap naggasiullugu oqaatigissavaa nunatsinni aningaaseriviit nunarsuup kitaani aningaaserivinnut allanut piumasaqaatit atugassarititaasullu assinginiq peqarnissaat pingaaruteqarmat. Aammattaaq siunnersuutit akuerineqarnerat Namminersorlutik Oqartussat nunani tamalaani taarsigassarsisitsisarnermik niuerfinni aningaasalersuisussanik ujarlerpata tamanna Kalaallit Nunaannut toqqaannanngitsumik iluaqutaasinnaasoq ilimanaateqarpoq, tassami siunnersuutit taakku atorlugit Kalaallit Nunaat taarsigassarsisitsisinnaasut assinginiq inatsiseqalissammat.

Siunnersuutit, tamatumunngalu atatillugu suliniutit akuerineqarnerat aningaasaqarnermik suliassa qarfimmil maleruagassat assigiialernerannut peqataaqataassasoq, tamatumalu peqatigisaanik Kalaallit Nunaanni aningaasaliinissami maleruagassat sorliit atuunnerat pillugu nalornissuteqarunnaassasoq ataatsimiititaliaq isumaqarpoq. Tamanna Kalaallit Nunaanni aningaaserinermik ingerlatsiviit unammillersinnaassusiata attatiinneqarmissaanut peqataaqataasinnaassaaq, taakku taarsigassarsiniartunut inuinnarnut inuussutissarsiutinillu ingerlataqartunut iluaqutaasumik nunani tamalaani aningaasanik niuerfinni aningaasanik pissarsiniartarnerat oqinnerulissalluni.

## **5. Siunnersuutit aningaasaqarnikkut kingunerisassa**

Tamanna pillugu Naalakkersuisut oqarput:

*”CRR-imut peqqussutip aamma akiligassarsisitsisarfinnut aningaasaateqarnissamillu piumasaqaammik malitassap (CRD IV-ip) piviusunnagortinneri inuussutissarsiutigisaqartut sulialinnut tunngatitatut teknikkikkut inatsisiliornerut pingaarnerutillugu suussusersineqarsinnaapput. Nunatsinni aningaasaqarnermik immikkoortoqarfimmik inatsisilersuinermut tunngatillugu nalornissuteqarnerup nassatarisaanik pisortanut, inuussutissarsiorfinnut innuttaasunullu pingaarutilinnik killup tungaanut aningaasaqarnikkut kingunerisassanut aarleqqutaasumik akiuussinnaassuseqartutut siunnersuut nalilersugaavoq”.*

Siunnersuutit aningaasaqarnikkut kingunerisassa at eqqarsaatigalugit Naalakkersuisut naliliinerannit allaanerumik naliliinissaminut ataatsimiititaliaq tunngavissaqanngilaq. Naalakkersuisut tamanna pillugu paasissutissiinerat ataatsimiititaliamit tusaatissatut tiguneqarpoq.

## **6. Ataatsimiititaliap inassuteqaatai**

### **Siunnersuutit Inatsisartunit akuerineqassasut ataatsimiititaliamit isumaqatigiittumit inassutigineqarpoq**

Taama oqaaseqarluni isumaliutissiisummilu oqaatigineqartutut paasinnilluni ataatsimiititaliap siunnersuut aappasaaniigassanngortippaa.

---

Siverth K. Heilmann  
Siulittaasoq

---

Justus Hansen  
Siulittaasup tullia

---

Iddimangiiu Bianco

---

Ineqi Kielsen

---

Aqqaluaq B. Egede